



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 6

Yangia anidakangma :



Tir Yimyim



tir_yimyim



tir yimyim

TAPAK 8

Debabrata Saikia-i AASU dang CAA
anema noktaksü ayongzüker

US Open: Alcaraz aser Djokovic
na semifinals asayatsü



VOL. XXII ISSUE NO. 321 (ADOK 321)

DIMAPUR

YANGTEPNÜ (THURSDAY)

RONGJUI (SEPTEMBER) 04, 20: ₹ 5.00

Nagaland nung PAP aser FMR tenokdangba malitsüla: CM Rio

Kohima, September 3, 2025 (TYO): Nagaland sorkari Protected Area Permit (PAP) aser Indo-Myanmar arrtsülen Free Movement Regime (FMR) alenbangba magizüker ta Centre dang metetdaksüogo aser item ozüng kübok Nagaland medendaktsütsü mepishiogo ta Chief Minister Dr. Neiphiu Rio-i ashi.

NPF MLA Achumbemo Kikon-i iba onük benoka jembidang CM Rio-i Nagaland, Arunachal Pradesh, Manipur, aser Mizoram nung PAP aser FMR tanaben benokba metetdaksü.

Nagaland nung tensa junga dang lir aser law & order azüoka lir. Manipur nung tensa majungba aser arrtsü adena orr telungpur maparen inyakba ajanga Centre-i PAP aser FMR tabanen benok ta Rio-i ashi.

Centre-i FMR limit kilometer 16 nungi 10 ajemogo aser Assam

Rifles o state agencies dang pass agüja arrtsü adena senzürtem mita reprangtsü tetuyuba agütsü ta paisa ashi.

January 6, 2025 nü Nagaland cabinet mezüng senden nung PAP aser FMR magizükba metetdaksüogo. Iba lemtet ajanga kilometer 215 international border nung aliba Naga kintem aser yimtsüngtem tsüngda telemsa adokdaksür ta sangdongogo ta CM Rio-isa ashi.

Nagaland Assembly-isa Union Home Ministry nem temepishiba aika agütsüogo aser tesüsabubaji July 19 nü agütsü ta paisa ashi.

North Eastern Council (NEC) plenary sessions aser Union ministers den ajurutepdang pai iba onük lemsatepa arur ta Rio-isa shisem.

"Nagaland sorkari foreign tourists anenzükba aser senzüsenbongba nung tenük yoka reprangba Centre dang shiogo" ta paisa ashi.

Ao Lanur Telongjem-i AYUSH Hospital junga yanglutsü nenshir

Dimapur, September 3, 2025 (TYO): Sabangya nung yipden 50 Integrated AYUSH Hospital mejungi yangluba atema Chungtia Village Council aser Chungtia Students' Union (CSU)-i ola adokba pusema nungiter ta Ao Lanur Telongjem (ALT)-i metetdaksüogo.

ALT-i Department of Health & Family Welfare dang joint inspection ka asütsü aser iba nung Chungtia Village Council, Chungtia Students' Union, district ketdangsürtem, civil societies aser Department ketdangsürtem adentsü takhangba agütsüogo.

Iba ajanga mapa inyakba osang tejangja metettsü ta ALT Convener Imnaonen Pongen aser Co-convener Tia Longchar nati sangdong ka nung ashi.

Iba mapa ya kanga junga inyakshitsüla aser Department-i contractor nem mapa shitak inyaktsüsa telatetba yutsütsüla ta ALT-isa metetdaksü.

Contractor-i January 2026 nung mapa tembangtsü atema inyaker saka iba dak rangloker mapa mashii meinyaktsüla. Department temulung asütsüba dang masü saka lokti temulung asütsüsa inyaktsüla ta parnokisa ashi.

Department-i sendaktepa alir ajak den tongteprateptsüla aser parnok teinyaktsütem metetdaksütsüla. AYUSH Hospital yangluba ya asenok atema tajangzük lir aser iba mapatong ya jungjunga inyakdaksütsü. Onoki iba mapa nung tenük yoktsü aser nüngdakba mapa inyaktsü kecha nungnanga mali ta ALT-isa metetdaksüogo.

"Chungtia Village Council aser Chungtia Students' Union-i mapa tajung inyakba aser tenük yoka reprangba atema tenüngsang agütsür. Parnoki joint inspection asütsü akhangbaji tim aser kanga nüngdak" ta Ao Lanur Telongjem (ALT)-isa metetdaksü.

DoP-i smart meter inoktsü atema jangjashitsür

Dimapur, Rongjui/September 03 (TYO): District nung smart meters inokba mesüra melenba atema sen memeshitsü, ta Department of Power, Electrical Division Dimapur ajanga jangjatsüogo.

Iba maparen ya Government of India indang SASIC aser RDSS schemes kübok inyaker.

Post-paid nungi pre-paid meters dangi melenba mapang sen talila memeshitsü mesüra security deposits malitsü aser

'existing deposits' asoshi tajungba ka nung inyaktsü, ta Department-i metetdaksü.

Electricity Rules 2020 aser sorkari sangdong agütsüba ama kechi südir süaka smart pre-pait meters agi post-paid meters melentsü ta ashi.

RDSS kübok power supply tajungba kumdaaktsütsü asoshi sorkar offices, industries aser commercial establishments nung smart meters inokogo ta ashi.



September 3, 2025 nü Nagaland Chief Minister Dr. Neiphiu Rio-i Longkhim Local Ground nung Mungmung-cum-Mini Hornbill Festival nung alekteta jaoker ka ama shilem agiba angur. Iba sentong nung Chief Minister Rio-i Naga nunger dang sobaliba wazüka ayutsü aser ajungkettsü ayongzük. Sorkari Hornbill Festival, Mini Hornbill Festivals, aser road shows balala ayonga agiba ajanga sobaliba ajungkettsü meranger ta paisa ashi.

NPF MLA Azo-i job reservation policy meyipa reprangshidaktsünür

Kohima, September 3, 2025 (TYO): Nagaland sorkari job reservation policy kanga junga asadanga meyipa reprangshitsüla ta Naga People's Front (NPF) MLA Kuzholuzo (Azo) Nienuni Mongulbarnü assembly nung ashi.

Personnel Information Management System (PIMS) aser Census of India nung kintem nütsüng yongsük meneptepa aliba angur. Tasüba, mapa nungi sodi anguba aser tasen shimokba ajanga meputep kar alitsü akok ta Azo-i ashi.

"Angami nunger sorkar mapa inyaker PIMS nung 13,256 aser Census nung 13,239 sayur. Külen, Aortem PIMS nung 21,093 aser Census nung 21,005 lir" ta pai ashi.

"Nagaland nung tongti kin pungu- Ao, Angami, Lotha, Rengma aser Sumi nungeri

reservation policy meyipa reprangshitsü akhangba pusemer saka iba tebilemtsü atema lungkak aitbabo menungiter" ta Azo-i ashi.

Sorkar mapa nung shimoktsü atema 1977 sangdong nung shisaliok aser rongsenketzüng tsütsü tangar memenepba aser sorkar mapa inyaker kanga maliba kintem jangjatsü lateta liasü. Tanü iba telatet kübok madenba kintem backward quota nungi agitettsüla, ta Azo-i ashi.

"Sorkari Reservation Review Commission tentetba pelashishia agizüker saka iba mapa inyakdang kin shia indang nütsüng yongsük asadangtsüla, department shia nung kintem sasep employment data bendentsüla, sorkar mapa inyakertemji nütsüng yongsük den puet asü meputep

asadangtsüla aser updated population & employment records nung ajemdaker lenmangtem bushitsüla" ta Azo-i tebilemba lemsatep.

Konyak quota lemozütsüba nung Konyak nunger den kin 7 nem kasa 25% reservation agüja lir, ta Azo-isa ashi.

"Nütsüng yongsük aser mapa nung shilem mekazüka yutsüba nung meputep lir. Kin 7 bo parnok population ratio dang nungi sorkar mapa inyaker teimba lir aser kin 9 bo tajemba lir" ta paisa metetdaksü.

"Chakhesang nunger nütsüng yongsük 1.54 lakh lir aser Zeliang nunger 74,000 lir saka kin anaprong 4% reservation lemozüka lir. Külen, Pochury nunger (21,000) aser Kiphire nung Sumi nunger (15,000) 2% reservation lir. Item ya meyipa reprangshitsüla" ta Azo-isa ashi.

NSF-ia COVID mapang shimokertem regularize asüba magizüker

Dimapur, September 3, 2025 (TYO): Nagaland sorkari COVID-19 wara mapang mapa nung aniokertem regularise asütsü lemtetba magizüker ta Naga Students' Federation (NSF)-i Bodbarnü metetdaksüogo.

Departmental screening process ka ajanga dang Medical Officers aser Junior Specialists 98 dena contractual health workers 280 regularise asübaji tim masü, ozüngi memelar aser recruitment rules anema lir ta NSF-i ashi.

Health and Family Welfare Department-i August 18, 2025 nü sangdong agütsüba aitsür ta President Medovi Rhi aser Secretary Education Temjentoshi nati Chief Secretary dangi züluba shidi nung shia lir. Nagaland sorkari September 4, 2024 nü Nagaland Public Service Commission (NPSC) aser

Nagaland Staff Selection Board (NSSB) majangi regularization asüba magizüker ta metetdakja lir ta NSF-i nenshiogo.

Nagaland Health Service Rules, 2006 nung Class-I Gazetted mapatem NPSC ajanga shimoktsü lateta lir. Doctor 98 aser tangartem tim mesüi aniokba ajanga sorkari kasa maongka magütsür aser open exams atema renemertem lenmang shibangtsür ta NSF-isa ashi.

2015 aser 2024 tsüngda NPSC ajanga Medical Officers 61 aniok ajisüaka tang sangdong ka ajanga parnok 98 tashi khen nung regularize asütsü meranger. Nagaland nungi kümshia MBBS graduates 150 tema adoker aser ibala inakyim ajanga mapa manguba khuret tuluba akümtsü aser backdoor appointments shitak ama kumdaaktsütsü ta NSF-isa metetdaksüogo.

COVID-19 mapang doctors

aser health workers-i mapa tajung inyakba meteta lir aser pelar, ajisüaka parnok contract tangatetba nung khen atema shimoker ta tejangja shia lir. Anungji parnoki regularize asütsü temeten mali, parnoki mapa tajung inyakba agizüker aser tenüngsang agütsü saka iba nung ajemdaker tim masübabo meinyaktsüla ta NSF-isa ashi.

NSF-isa Chief Secretary dang COVID mapang shimokertem nem grace marks aser one-time age relaxation amala agütsütsü aser NPSC aser NSSB ajanga open recruitment asütsü shidangogo.

"Sorkari contractual health workers 280 regularize asüba sangdong meyipa agitsüla aser mapa ajak NPSC/NSSB nem agütsütsü akhanger. Tim masüba mapa anema onoki ozüngi melaba ama anema noktaksü" ta NSF-isa tekümdangtsü metetdaksüogo.

IFS officers den Nagaland sorkar senden amen



High Commissioner of India to Mozambique, Robert Shetkintong aser Consul General of CGI, Vancouver, R. Masakui den Nagaland nungi tongtipang nisungtem aser stakeholders tem Hotel De Oriental Grand, Kohima nung September 2, 2025 nü Roundtable Meeting amendang tangokba noksa nung angur.

Dimapur, Rongjui/September 03 (TYO): Investment & Development Authority of Nagaland (IDAN) ajanga Nagaland sorkari Hotel De Oriental Grand, Kohima nung September 2, 2025 nü Indian Foreign Service (IFS) ketdangsürtem den Roundtable ka ayongzüka liasü.

Iba senden nung Advisor to the Chief Minister and Chairman, IDAN, Abu Metha aser Minister, Advisors, aser department balala nungi ketdangsür aser stakeholders tem dena liasü.

Iba senden nung High Commissioner of India to Maputo, Mozambique, Robert Shetkintong aser Consul General of India in Vancouver, Canada, R. Masakui nungertem aden, shirnok Sushma Swaraj Institute of Foreign Service indang Mid-Career Training Programme (MCTP-III) nung shilem ka ama State Attachment nung lir.

Abu Metha-i tongtipang nisungtem aser shilem agirtem pela agizükba o jembia aser mepetmesü agi sünger aliba state

ka nungi sobaliba, saisapong aser tourism nung maongka balala aliba state akumba indang temelenshi rateta ashi.

Minister, Tourism & Higher Education, Temjen Imna Along-i Nagaland nung yimtsüing 2,000 dak tema aliba, yangji tetsü tetsübo makai aliba aser state yimchiyimjung nung alitsü mangdang aliba lemsatepa liasü.

Pai Nagaland indang 'creative economy', employment opportunities tashi itshtüsü aser state indang sobaliba aser loktiliba anitetsü nüngdakba indang lemsatepa liasü.

Senden nung IDAN aser TaFMA (Task Force for Music & Arts) ajanga kenten-menü, handloom, handicrafts, film aser Hornbill Festival ama benjongbentsü nung sempet akaba sayua liasü.

Sensaksemba mapang saisapong ya youth empowerment asoshi tanishir ka amai lir ta ashi. Iba mapang Abu Metha-i Nagaland ajanga November 2025 nung World Belt Wrestling Championship ayongzüksü ta ashi. Kasa

mapang traditional sports, e-sports aser athletes aser coaches asoshi exchange programs atema jembia liasü.

R. Masakui-i Nagaland indang tashi ya India indang Act East Policy den lirumedemtsü, educational exchanges, indigenous knowledge temaba jenjangi ajungkettsü aser Naga nunger osettem alima nem metetdaksütsü ashi.

Robert Shetkintong-i Nagaland dang sobaliba tsütsü tesendaktep ulushitsü, tourism temaba jenjangi ajungkettsü aser artisans aser entrepreneurs atema market linkages agütsütsü ajungshia liasü.

Iba senden nung legislators, ketdangsür aser stakeholders temi private sector shilem tali agidaksütsü, handicrafts yaritsü, handloom bendang lima nung bener oa ayoktsü indang mangdang lemsatepa liasü.

Asia nung Nagaland ya 'creative economy' indang tesepe ka kumdaksütsü asoshi külemi inyaktsü pangjema iba senden ya tembanga liasü.

Medziphema nung computerized PACS indang orientation tenzükogo

Dimapur, Rongjui/September 03 (TYO): orientation sentong ayongzüik, ta pai ashi.

Registrar of Cooperatives Societies ajanga anogo ana atema Cooperative Training Centre, Medziphema nung ayongzüikba potential computerized PACS (Primary Agriculture Credit Societies) orientation sentong September 3, 2025 nü tenzükogo.

Tetushi tesemdang ka ama Orenthung Lotha, Commissioner and Secretary for IPR and Co-operation Department ajanga jembidang PACS computerize asüba nungi tajangzüik anguba indang lemsatep aser iba yagi financial inclusion aser aluyimer nem service agütsüba nung tali tashi aitba kisüing masü saka services balala atema 'nodal service delivering point' akumtsü, kong ali temu aser metsüjang amala angutsü, ta ashi.

PACS ya pei sasa peria aliba lokti kumdaksütsü Government of India mangdang ama aser cooperative societies ajanga yimchiyimjung lidaksütsü mangdang den lirumedema iba

Orenthung-i cooperatives movement indang puti otsü rateta ashi aser ibai India indang tongtoret lir, kong nisung crore 29 tashi India nung cooperative movement nung dena lir, ta ashi.

Pai nükjiding, inyakyim balala aser PACS computerization asütsü nüngdakba indang tejangja rateta ashi aser Co-operatives Society tem dang temulung agüja inyaktsü ayongzüka liasü. Pai iba orientation nung dena alirtem dang co-operative shisatsü ya nüburem den lemsateptsü mepishi aser societies aser ketdangsürtem tenüing asang.

Iba sentong nung Chubamenla, Principal CTC menden liasü, kong Akangjongshi, Deputy RCS ajanga tayongzüikba o jembia aser Jonah Sema, G.M NSCB Ltd ajanga o tatsüka jembia liasü.

Iba sentong nung Co-operative Society 44, SRCS, ICS aser ARCS 12 shilem agitar, koba September 4, 2025 nü tembangsü.

Coffee Board of India züngsemtem Nagaland nung arua lir



Dimapur, Rongjui/September 03 (TYO): Coffee Board of India (CBI) nungi Board züngsemtem September 2, 2025 nü Nagaland tonga aru aser parnok Kohima-i maodang City Square Complex, Chümoukedima nung Juro Roastery & Juro Coffee House semdanga liasü.

North East Region aser talisa Nagaland nung coffee

terenlok aser tejakleni aoba angatetsü asoshi parnoki tang state semdang. Iba den külemi parnoki coffee entrepreneurs tem ainba aser parnoki timtem ajuruba angatetsü aser local market aser market linkage tsütsü coffee nükla jangjatsü.

Coffee Board züngsemtem ya Chairman M.J. Dinesh, CEO aser Secretary Kuma Roa M. IAS nati anir lir.

Fazl Ali College nung mock drill ayongzüka agi



Dimapur, Rongjui/September 03 (TYO): Department of Fire and Emergency Services ajanga September 3, 2025 nikongdang 2:00 ako nung mock drill ka Fazl Ali College, Mokokchung nung ayongzüka agia liasü.

Keleseho Stephen Tsukru, OC Fire station, Mokokchung lenisüba kübok theory session ka college auditorium nung agia iba sentong tenzük, kong shisalen sayurtemi ajungben kitsük-kirong aser lendong balala mapang renemshia alitsüba, shisatsü renloktsüba aser nüngdakba life skills angazüka

alitsüba indang jembia liasü.

Iba mapang ano slide presentation ka sayuba ajanga kaketsir temi fire safety indang tajungba nung angazük.

Iba session nung kaketsirtem dang 'fire triangle' (mi nung tongtipang components asem) aser mi telemsa balala indang angazükdaksü. Ketdangsür ajanga mi tabu balala nung amshiba extinguishers indang rateta ashi aser CO2 aser DCP extinguishers ya tensa ajunga nung amai amshitetsü ta ashi. Nagaland nung kitsük-kirong lendong timtiba atalokba

district tematiba pezü rongnung Mokokchung ya lir ta ashi.

Theory session agiba sülen auditorium kima practical demonstration sayua liasü. Training agütsür temi gas cylinders komaser shibangtsü, teka, bucket aser blanket ajanga mi remsepba aser fire extinguishers yimya shidak nung amshitsüba indang sayua liasü.

Iba mock drill yagi kaketsir nem ajungben kitsük-kirong lendong ajuruba mapang takum kumzüka alitsü asoshi mera tejangja aser osangtsüsang angazükdakja liasü.



Kohima District-Level Teachers Award sentong September 3, 2025 nü District Education Officer (DEO), Kohima office nung agiogo. Iba sentong nung Deputy Commissioner, Kohima, B Henok Buchem, DEO Kohima aser District Level Teachers Award angur parnok pezü noksa nung angur.



September 03, 2025 nü New Delhi nung Ato kilonser Narendera Modi-i Semicon India 2025 exhibition hall semdangba noksa nung angur. Kasa noksa nung Union Minister Ashwini Vaishnaw-a angur.

India-i Afghanistan nem teyari oset touzük seret 21,000 agütsüogo

New Delhi, September 03 (Agencies): Bodhbarnü India External Affairs Minister, S Jaishankar-i, India-i menoknok lendong ajangshiba Afghanistan linük nem chiyungtsü aser mozü densema teyari oset balala touzük seret 21,000 agütsüogo, aser ibaji tayimtsü ajanga Kabul yimti tongtsüogo, ta metetdaksü.

Teyari osettem rongnung hygiene kits, blankets aser sleeping bags densema lir. Taoba Amongnü aonung Afghanistan nung menoknok lendong tuluka ataloka liasü aser tang tashi nung iba lendong nung nisung 1,400 dak tali asüba jangjaogo.

August 31 aonung 11:47 ako meta menoknok lendong tulu ataloka liasü. Menoknok anokba tiyongtsü tesemji Nangarhar provinace yimtiba, Jalalabad nungi kilometer 27 shi pilar liasü. Jaishankar-i twitter ajanga, "India-i menoknok lendong atema tayimtsü ajanga teyari yokba osettem Kabul tongogo. Teyari oset touzük ton 21 nungji blankets, süki, hygiene kits, tzü rizüngba tanks, generators, chipo-aonpo, tzü purifiers, sleeping bags, mozü, wheelchairs, hand sanitizers, water purification tablets, ORS solutions aser medical osettem densema lir," ta metetdaksü. Paisa, "India-i maneni iba

tensa asadangtsü aser taruba anogotem nunga maneni teyari agütsütsü," ta metetdaksü. Menoknok lendong nungji talisa Kunar province tamajungba kongshia kiojen 8,000 dak tali raksaogo. Hombarnü Ato kilonser Narendera Modi-ia Afghanistan nung lendong ataloka nisung jenti asüba atema mangyim tejashi lemsatepba den külemi India-i akokba tashi yaritsü melunga lir, ta metetdakja liasü. EAM Jaishankar-ia Afghanistan Foreign Minister Amir Khan Muttaqi den phone ajanga jembidang mangyim jashi lemsatep aser India-ia yaritsü, ta metetdakja liasü.

Umar Khalid nem bail magütsüba anema JNUSU-i longkak aittsü

New Delhi, September 03 (Agencies): Umar Khalid nem joko tang agi trokbenbuba bail magütsüba sülen Bodhbarnü Banojyotsna Lahiri-i, pa indang legal team-i Supreme Court nem temepishiba ken o agütsütsü, ta metetdaksü. 2020 küm Delhi nung rara adokba dak sendakba nung tai tonglokja Umar Khalid aser Sharjeel Imam na densema nisung aika apu. Mongolbarnüa Delhi High Court-i Umar Khalid aser Sharjeel Imam na bail temepishiba magizük. Citizenship (Amendment)

Act, 2019 aser National Register of Citizens (NRC) anema longkak aitba mapang nung northeast Delhi nung rara adoka nisung 53 asüba dak sendakba ken o nung 2020 küm September ita nungi Khalid den tangar nisung ti jail nung puoka lir. Unlawful Activities (Prevention) Act kübok Khalid den tangartem anema ken o benok. 2022 küm December ita nung Khalid nem hopta ka interim bail agüja liasü. Osangbenertem den jembidang Lahiri-i, ken o

mangadangi nisung kar jail nung küm pongu tashi puoka ayur, anungji parnok nem bail agütsütsü temsüa lir, ta ashi. Khalid apuba sülen küm pongu ajungba nüngtem nung September 13 nü Jawaharlal Nehru University Students' Union (JNUSU)-i longkak aita jajatsü sentong lir. JNUSU Tir, Nitish Kumar-i, ketdangsertem anema longkak aiterem, talisa kaketshirtem nem bail magütsür, ajisüaka rara adoktsüsa inyakertembo sademsadema senzüteper, ta ashi.



September 03, 2025 nü New Delhi nung Germany Foreign Minister Johann Wadepful aser Union Minister of Commerce & Industry, Piyush Goyal na senden amendang tangokba noksa nung angur.

Punjab kübok district ajak tzümetsüng lendong agi kongshiogo

New Delhi, September 03 (Agencies): Küm aika tsüngda tang Punjab-i tzümetsüng lendong lendong tuluba ajangshia lir; Punjab ya 'lendong agi kongshiba state' ta sangdongogo. Punjab Chief Secretary aser State Executive Committee (SEC) chairman, KAP Sinha-i Disaster Management Act, 2025 kübok Arrla 34 nung ajemdaker nüngdakba tetuyuba agütsütsü atema district magistrates nem tashi agütsüogo.

District Disaster Management Authorities (DDMAs) ajak dang lendong agi kongshiba nüburttem nem tekeraba nung teyari agüjang, ta tuyuogo. Iba dak alia state nung tim departments ajaki peipei tesem nung lemozüksüba emergency mapatem inyaktsü aser nüngdakba telemtetba agia inyaktsü. Iba dak sendakba nung sepaitem nem lemozükja aliba maparen ajaki departments-i ketdangsüa reprangtsü. PWD, Water Resources Department aser PSPCL dang rongdak süa

maparen balala inyaktsü atema tuyuogo. Departments aser DDMAs-i peipei tesem nung nüburttem senzüsempongba, osettsüset, chiyungtsü aser nüngdakba services ajak ketdangsüa reprangtsü. Telecom service providers danga tekeraba nung teraksatsübatem yanglushia state tesem ajak nung mobile aser landline connectivity alitsü atema inyakang, ta tuyuogo. Punjab nung tzümetsüng agi district ajak (23) kongshia yim 1,200 dak tali nung tzü metsünga lir. Panchayati Raj Institutions aser Urban Local Bodies dang yimtsüngtem nung kümzükba maparen aser teyari agütsüba maparen inyaktsü aser akokba tashi DDMAs aser state departments den amalitepa inyaktsü tuyuogo. Tang Punjab nung alu ali acre lakh 3.75 nung tzü metsünga lir, aser ibaji ajanga alu aruhtsü hopta ishika dang lia takoksa tulu nguogo. Iba dak alia kiset shiruru-a aika samaogo. Tang Bhakra Dam nung tzü süklep 1,678 aser Pong Dam nunga tzü süklep 1,393 tashi tuogo.

Linük 3 nungi arur minority tem passport meliaka alitsü melatsü

New Delhi, Rongjui/September 03 (Agencies): Afghanistan, Bangladesh aser Pakistan linüktem nungi minority trok - Hindu, Christian, Sikh, Buddhist, Jain aser Parsi nungertem shirnok December 31, 2024 anogo tashi nung India-i arua lir, parnok ket nung passport meliaka linük nung alitsü melatsü, ta sorkar osang ka ajanga metetdaksü. December 31, 2024 anogo tashi nung passport aser travel documents shidak bener India-i arur minorities India nung maneni alitsü melatsü; Immigration and Foreigners Act 2025 kübok parnok anema meinyaktsü. Hombarnü Immigration and Foreigners (Exemption) Order ka ajanga, Nepal aser Bhutan nungi aser Tibet nungertem 1959 nungi May 30, 2003 tsüngda Kathmandu nung Indian embassy-i agütsüba special entry permit ajanga India-i arua alirtem aser foreigners registration officer nung register süa arua alirtema iba Act kübok meinyaktsü. Ajisüaka China, Macau, Hong Kong mesüra Pakistan ajanga India telungi aiter Nepal aser Bhutan sensotem anemabo iba ozüng kübok inyaktsü. Iba Act kübok Arrla 21 nung yamai shia lir, passport mesüra visa densema travel documents tejangja malir bendangertembo küm pongu tashi tepuokdak ayutsü akok mesüra senchi sen lakh 5 tashi achitsü akok.

Iba Act kübok Arrla 23 nung ajemdaker mapang tali India nunger amonger bendangertem tepuokdak küm 3 tashi puoktsü akok aser senchi sen lakh 3 tashi achitsü akok. India nung bendangertem mapang tali mongloksü atema mapang meshisemba ozüngtemji January 9, 2015 tashi nung India-i arur Sri Lanka nungertem atemabo mebenshitsü. Ano diplomatic passports alir bendangertem dang nungibo visa memeshitsü. Iba Act mapa küma benoktsü atema states/UTs nem tashi agütsüogo. Visa mapang dak tali amonger bendangertem dang FRRO/immigration officer-i senchi achitsü. Tibetans, Mongolia nungi Buddhist putirtem, Pakistan nunger, Bangladesh aser Afghan nunger long term visa atema temsüa lir, parnoki senchi sen 50 nungi 550 tashi agütsütsü. Visa mapang süir anogo 30 tashi mongloker bendangertem dang senchi 10,000 tashi achitsü, anogo 31-90 tashi tali monglokertem dang senchi 20,000 achitsü, anogo 90 nungi 180 tashi monglokertem dang senchi 50,000 aser anogo 181 nungi küm 1 tashi tali monglokertem dang senchi lakh 1 achitsü. Yamaji küm kaka tali monglokba shia senchi 50,000 bendenloksü aser item ama senchi ya teimba agi sen lakh 3 tashi achitsü.



TIR YIMYIM YIMOBILEM (EDITORIAL)

DIMAPUR THURSDAY, SEPTEMBER (RONGJUI) 04, 2025

Ozüng agibo moijing menokdangtettsü!

Nagaland nung tang ya, ashiko, Yisu külemer dang nungibo moijing külemertemang teimba asütsüa akok, kechiyong lanurtemi satan külemer ta asüba otsü ya bilemdang dang, lanurtem dang masü saka Tsüngrem tenzükba mapa nung alir putir aser lokti nung taintemi inyakba mapa aser asenok libaliro reprangdangra, Yisu külemertembo memesük, kari rongsen penbur, kari naroküm bushir, kari tenüngsena jajar, kar shi azü mazüok, kar azümesen aser aikati tiyazü jembir ta Yisu masü saka satan külemertemang küma omadagi. Ibayongji, asenok tenla kidang ya Yisu dak amangertem masü saka Satan dak amangertem adenshir amai dang kati ka reprangtepa alitsü südi. Iba ama mapang ka nung, Nagaland tatar senden nung dena Nagaland nung Satan külemba ya özüng agi nokdangtsü asoshi ken o benoka jembitsü merangdangba ya, onükbo shitak saka sabang tai nung meshitak nisungtemi jembir asütsü. Nagaland nungbo nisunga dena özüng agi azüoktsü makoker nung, kodaser özüng agi satan azüoktettsü ? Ibaji bilemdanga, asen lima nung satan külemba yimsü tasen ya özüng agi nokdangtsü asoshi tatar senden nung ken o benoka jembidang, satan anema özüng latettsü bilemtsüba dang nungibo kodaser özü lima nung özü nübortemi taküm Tsüngrem külemtsü melena Satanang külemer ta süoki ia bilemtsübajiang kanga tongtibang lir. Atangji, asenoki tanü jembiba Satan külemba otsü ya nisung kar aonung leper nung oagi temenen tanela bushia oagi tashi balaka meshia külemba indang jembir asütsüa akok. Mesüra, temenen süngyanglu yanglur azü dena tenla agüja külemba yimsütema alitsü. Item ajakji nisungi pei tebilemba atongtsü asoshi tangar dang nungi tashi tuluba ka aginüa bushiba mapa lir aser item moijing külemertemji teimbaka lanurtem asütsü. Atangji, tanü lanurtemi Yisu toktsür Satan külemba kulitemji bushidangra, kibong nungi tenzuka arogo aser yimten nung ochimashi mapatem agi lanurtem taküm raksadaktsüba ajanga tenzükba kuli bushitettsü. Item moijing külemertemji Khristan kibongtem nungi intetba rogotem asütsü, ajisüaka kibong nung sarasadem agi matu aser arogo nung Tsüngrem o agi junga memesütetba purtem teimla samar, joko tanga teimla aser tashi tasen ka bushitsü tenzükba purtem lir. Atangji, item satan külemertemji pei kibong aser arogo dak dang teimla samaba masü saka state government dak dena teimla samaba agi tanga Satanic government tashi ka bushia aobatem lir. Aji oda, asenok government nung alirtemi lanurtem alu nung, factory nung aser business mapa tapu balala nung mapa inyaker meinyakma adokdakja agütsütsü melen, item sentongtem ajakji asen kisung sentong kümer asen kija agitsü asoshi dang bendena yura, shibabo teimla mesamatsü ? Item meindang aser ochimashiba tashi den tokteptsü asoshi Yisu dak mamangtet moijing tashi bushitsüsa akümbaji, parnok satan külemertemji masü asenok tsürabur, asenok Tsüngrem tenzükertem aser asenok yimsüsürtem tai lir. Ibaji kodang jungjunga bilemdangdir, asenoki Yisu masü saka satani mulungba dang inyaka sayuba ajanga parnoka asenok jilu ajizüka külemer amai angatettsü. Tanü asen loktiliba nung satan külemba yimsü agi amoksepdi asüdang, satanji özüng agi aridoktsü memerangi Yisu dak dang shitak amanga Yisu tenüng nung satanji aridoktsü merangtsüba dak alaka, iba lima nung nisungi satan anema raratsü tanga tashi aser hadirbo mali. Atangji, iba tebilemtsü? ya yimten yimsüsürtemi tatar senden nung jembitsü benokbaji junger, kechiyong idangjiang asenoka asen mapa aser libaliru nung Yisu külemer asü Satan külemer jangjatsü. Ashiko, asenoki satan ya aonung nisung malidak leper nung dang oa külemer amai bilema alitsü, saka asenoki asen kidang aser asenok mapa inyakdak ochimashi mapa inyak shia aser meshitak benshi shiaji satan külemdagi ta metettsüla. Ibaji özüng agi masü saka asenoki asenoksasa Yisuji asen taküm aser mapa ajak nung kibur ta amanga, Pai mulungba nung ochishia ali nung dang, asenok den satan melitet parnoksa oa adoktsü.

OLEMSABANG

KECHI IMLAR

~ T. Lima Jamir, Artang Ward, Mokokchung

Khrista nung temeim asen Aor kin aser Naga nung nüt süng nübur aser amangbapurtem, iba lima temenen lima nung ken lirbo aotsüba lima nung asenok alir. Asenoki gari jenti alitena yuaka aser ki tajung jenti yanglutena yuaka asenoki itemji bener maotsü. Asen tsüraburi koma mangsa aso yamaji mangsa aotsü aser asen temang ya yimer li nung mesüra bendanger lima nung aremtsü. Anungji pei tanüla kümzüksü asoshi ochishia Tsüngrem amangtsüla masü nu? Tamangerbo tamanger ama, saka pei temulungjang nung tsükchitep, arishitep, mokokachi, tenükmerem, ngasangatem, asüküm, kulak kübong, ashioktsüba aser ochi mashi, pei agitsü dang bilema litepra nai aser ni kotak yimli mongutetsü. Laishiba azünger, kena atener aser kidangi or sarasadem agutsür, saka tenla kidang pastortemi, Reverentemi, Doctortemi aser sayutsüngertemi ashiba manganür, pei temulungjang nung kechi bilemer jenti alitsüa akok anungji naji tamanger taküm ka süra tamanger taküm ka ama alitsü merangtsüla. Anungji temeim asen Aotsür aser Aor aser Nagatsür aser Naga nung amangbapur aser nüt süng nüpur tajungtem asüküm tenük merem, arishitep, aitsütep, tsükchitep mulungsentsü ya amatoker ochi tamang agi pei temulungjang aser pei taküm aser pei kibong ya yanglushi nungbo kanga ajungtsü. Pei kibong aser pei taküm yanglushira asen Khristan lima ya ajungtsü südi. Temeim nüt süng nübur aser amangbapur tajungtem, temenen tera tulubaji asen temulungjang ya masü nu? Kechiba mangateter aser kechiba memelenshiteter bilemdangang ma. Pei temulungjang nung Tsüngrem bilema maliba ajanga moijingi asen mulungjang metoktsür ta bilemtsüla, temeneni paper bener arua asenok matidangtsü, saka asen mulungjang temenen aliba ajanga pai asenok atidanger iba yongjiang asenoki ochi mashi inyakteper, ashioktsür, külakoktsür anungji naji tamanger aser ochi shia amangtsüba kibong ka asoshi rongsenji kanga dang nüngdak. Iba yongjiang Tsüngremi kibong shia nem moatsür, saka asenoki kanga tali tapong arishir. Temeim Naga nung aser Nagatsür aser Aotsür aser Aor nüt süng nübur aser amangbapur tajungtem asenok meimchirtemi kanga merena aser ulua bilema liaka kenü mesüra kenübo ali tang akumtsübapurtem lir aser pei yimer li mesüra town balala aser bendang lima nung dang aremtsüba nüpurtem masü nu? Kechiba Tsüngrem aküm metsübur aseni rizüngtena ayuba aser ki tajung jenti yanglutena yuaka aji bener maotsü asen tsüraburi koma aso yamaji mangsa aotsü aser ali dang akümstsü, saka asenoki iba lima nung alidang Tsüngremi maginütsü kechisa inyaka ali item ajakji Tsüngremi zülutena alitsü asünung item temenentem pai zünga sayutsü. Tasü aser taküm na obendangdak zünga sayutsü alinung Tsüngrem akümstsüba alitsü asenok ajaki merangdi arungma. Rev. Dr. pastortemi asen nübur ajungtsü aser melenshidaktsütsü asoshi Reverentem sendong balala yanglutena rongsen lalua bendang lima nungi tongti o jembir jaoka nübur ajungshir, saka ken angarbo amadoker anungji parnoki asen nüpur dang Tsüngrem o tera ajak kakteta ashir aji amajok mekümdaktsütsü asen mulungjang ya melenshidi arungma.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Temesepba chiyungtsü nungi kümzüka alitsü sentong ka agi

Impur, September 03 (TYO): September 3, 2025 nü Government High School Süngratsü nung Temespepba chiyungtsü nungi kümzüka alitsü sentong ka kanga takok ngua agiogo, iba sentong nung shisalen sayurji Wb. Limasangwa, Coordinator, Media & Social Concern, ABAM liasü.

Tanü tensa tamajung ka nung tanurtem dak dang nükla ayuba mapang, teraksatsüba temenen ajanga tamajungba lenmangi parnok anir oa asen tarutsü tia kecha makai aoba angur.

Tanü kaketshirtem nem tesayuba tajung agütsüba den külemi tekümdangtsü tejangja

sayutsü kangasa nüngdak ta angateta school nung students asoshi iba sentong agi.

Iba sentong nung shisalen sayur Limasangwa-i tanurtem dang tekümdangtsü sayuba dak alaka ajak asoshi tebilemtsü kar, ta ashi.

Tanü tanur asüidang nungi temesepba chiyungtsü bulua achi ajemba ya lokti libaliru jenjang (social environment) dak tuluka keta lir. Anungji, tesayuba agütsüba den asen lokti libaliru jenjang yanglushira aika iba tebilemtsü nungi kümzüka alitsü, kechiaser tain rogotemi jakdaka chia ajemba ajanga tanü tanurtemia iba ya yimya ama ka dang bilema anojungia parnokia chia ajemtsü

tenzüker, ta pa ashi.

Iba den külemi kanga tongtibang kaji, asenokbo moko machir saka tangari achiba ajanga asenok lendongi aiba nungi jenbutsü kanga tongtibang lir. Iba asoshi India nung lokti senden nung moko machitsü temzüng yanglua lir (Cigarettes and Other Tobacco Product Act, 2003, section 4). Anungji, ajak kümzüka alitsü asoshi school tem nung dang masü saka yimtsüng aser jila ajak nung iba temzüng agizüka benshitsü tang rongdak nüngdak, ta paisa shisem.

Tsüngremi asen lima nung tanurtem tajung aika adokdakja yimji yimjung lima ka yangertettsü tamang ayur.

Missionary Josh Sullivan South Africa-i tanaben meyipa aotsü



Missionary, Josh Sullivan'er kibong noksa

September 03, 2025: Taküm April ita nung Tennessee nungi missionary Josh Sullivan, South Africa nung par Arogo nung sayutsüngi tesüdak mapang telok kati puer aoba sülen anogo trok lir police-i kümzüka liasü.

Taoba ita pa South Africa-i tanaben oa tensa asadangogo aser maneni asentenshir tenzükba wadang inyaktsü atema telemtetba agiogo.

Arrshi küm 34, Sullivan puer aoba sülen South African Police aser pa puer aoertem tsüngda mapang tatsüka khatepdang nisung asem khaseta liasü.

Tawa par kibong South Africa-i aoba sülen Thailand-ia oa retreat ka nung denogo.

Missionary Sullivan-i, "Tesüiba ita ana ozü kibong ainlen jajaogo. Taküm April ita nung ni puer maodangyongi ozü kibongi Thailand semdanga mission retreat ka nung adentsü sentong liasü. Onoki iba sentongji amajok nung mesüidaktsütsü atema telemtetba agia liasü. Anungji July ita tetenzüklen onok South Africa-i oa hopta ana shi among, iba sülen Thailand-ia ao," ta metetdaktsü.

"Onok South Africa-i aobaji

taneptsüba ka ama liasü. Onoki ozü nüburtem ajungshiba nung mapang indok aser parnok tamang jenjang melulaba agi onok pelar. Onok yangji aliba mapang nung ozü Arogo nung mezüngbuba asüpila sentong agi. Ibaji tepelatsü mapang kabo masü saka takoksa anguba mangyimer kibong den Khrista osangtajung lemsateptsü atema maangka anguba asoshi onok pelaa liasü," ta pai metetdaktsü.

Taküm May ita nung interview ka nung jembidang missionary Sullivan-i, April 10 nü Motherwell nung aliba par Arogo (Fellowship Baptist Church) nung pai Tanela süngjangtem indang onük jembiba mapang prangpong amer nisung pezüi pa puer aoba metetdakja liasü.

Pa puer aoertem jagi pa chioktsü atema sen agüjang ta takhangba agütsü. Pa puer aoba sülen anogo trok tashi pa tejak sü agi nembangja liasü. Tatemsa April 15 nü South African Police-i iba telok denji mapang tatsüka khatepba sülen pa kümzüker.

South Africa nung elite police unit, The Hawks-i pa kümzüker. Iba mapang nungji The Hawks team-i sangdong

ka ajanga, "Intelligence osang ajanga pa aliba tesem jangjaba sülen team ka iba tesem jagi oa pa kümzüker," ta metetdakja liasü.

Police team ji iba tesem tonga aoba sülen kima aliba gari ka mita reprang. Gari nung alirtem jagi police anguba sülen ajentsü merang aser police dak injang khaloktsü. Police-ia parnok dak injang khalokja liasü.

Sullivan'er kibong ya 2018 küm November ita nungi South Africa nung alir. 2012 küm February ita nungi pa Maryville, Tennessee nung aliba Fellowship Baptist Church nung inyaka liasü. South Africa kübok Gqeberha yimti nung aliba Fellowship Baptist Church ya pastor, Josh Sullivan aser pa kinüngtsü, Megan nati tentetba Arogo lir.

Tawa Sullivan-i, "Ministry wadang asentenshir tenzüktsü atema tajaba lir. Onok tanaben South Africa-i oa Tsüngrem tenzüktsü atema sarasadema aruogo. Ni aser ozü kibong renema dang lir. Hopta trok shi ainlen jangratema senzüogo. Taküm December ita tatembanglen tashi nungbo onok South Africa-i aotsü," ta metetdaktsü.

ANOGO ABEN TSÜNGREM DEN

Tsüngrem nungi senmang T.Ken 127:1-5.

Kinü tanur tetsü nu menden nung alidang raksaa endokbaji tejashitsü lendong lir. Tetsü nu mendenji leper kümdaktsür.

T.ken 127 nung ashir, " Angang chirnurji Kibuba nungi anguba senmang, aser nu menden tejangji pa tajangzük lir. Temeranger nisung ket nung lijakjang ama, yamaji atura mapang asoba chirnur lir. Nisung shibai pei lijakjang pungdang sünga tepelatsü. Kodang parnoki parnok tsükchirtem den süngküm nung jembidir, parnok maksüa malitsü"(t.3-5). Ken züluri ashir chirnurtemji rongsen-senmang ka aser Kibuba nungi anguba senmang.

Rongsen jagi asenoki kechi inyaktsü ? Mezüngbuba asenoki aji agizüker. Kodang asen tanurtem asenok dangi arudir, asenoki parnokiji agizüker. Parnokji Tsüngremi asenok nem agütsüba sempet, rongsen ka lir, aser asenoki asen chirtem kümzüksüla. Parnok masüidang mekümzükbaji kanga dang tai lir.

Idangji asenoki parnokji rizüngtsüla. Asenoki tanurtem dang sayutsüla, angazükdaktsütsüla.Temeshi taküm angazükdaktsütsüla. Parnok takümüji sen rezüngba akümer, aser tajangzük arutsü tenzüker. Tambur- tantsür kümer tepela tulu angubaji lir. Tanurtemi asenok takar kümdaktsür.

Saka tanurtemji nok-o-nüa lir- "Iijak jang temeranger nisung ket nung ali ama" (t.4). Khristantemi alima nung Tsüngrem metetba tanurtem mesotetra shibai Kibuba asoshi raratsü? Kodang Tsüngremi alima nung mapa tulu inyakner, pai tila tanur alima dangi bener arur- Mosa, Samuel, Dawid, Yohan Baptitsüba aser Kibuba Yisu Khrista. Iba temenen lima nung, kodang ochiba anemer atoker, iba anema noktaktettsü asoshi asenoki "Kibubai yamai ashir ta shitettsüba tanur asenoki sayutettsü tenüngdaktsü.

Chirnurtemji Tsüngremer temoatsü saka ano mapa tulu. Kibuba nungi shisatsü agia tanurtem mesüang. Tsüngremi mulungba ama parnoki tenzüktettsü asoshi parnok renemdakjang aser pai ne nem agütsüba senmang nung pelaa liang.

Chhattisgarh kübok yimtsüng kar nung Khristantem nokdanger

September 03, 2025: yimsü dak sendakba sentongtem agitsü memelar.

Iba notice nungjisa, mesüzüka tribal nisungtem yimsü meyipdaksüba ajanga sobaliba maitsü raksatsür aser item ama mapatemji lisopur Adivasis mesüra tribals sobaliba atema amokmeren lir, ta zülua lir.

Ghotiya village council-isa, PESA Act kübok Rule 4(d) kübok sobaliba maitsü wazüka yutsü temeden agüja lir, ta metetdaktsü.

1996 küm India sorkari PESA Act (Provisions of the Panchayats Extension to Scheduled Areas) benoka liasü. Iba ozüng kübok tribal sobaliba wazüka ayutsü atema village councils (Gram Sabha) nem tashi agüja lir.

2014 küm nunga Chhattisgarh state kübok Baster district nung yim 50 shii Khristan missionary tem nokdangba notice agüja liasü.

AO OSHI ANGAZÜKDAK:**TANÜ ANGAZÜKTSÜBA OJANG****Tedi****(n)** ka dang nungi tambu (elder brother)


* Sakubai tedi dang teti tashi angar.

Teti**(adv)** mapang ajak nung (always)

* Asenok teti dangbo anema malir.



Tir Yimyim

OLONG PAITEP # 7260**TIPIEN**

1. Balaka

- (5)

6. Aika shirangba

- (4)

7. Tar tatsü

- (6)

9. Nenü'er jabaso

- (4)

10. Sen latetsüba

- (7)

11. Tangar kübok alir

- (4)

14. Lon nung inokba

- (6)

15. Tzü ayimdak

- (4)

16. Ajok

- (5)

LANGTSÜNGLEN

2. Hai sür inyak

- (4)

3. Aor tenüng ka

- (6)

4. Ali telungi talangka lur

- (5)

5. Tebang kenyongi mazüoker

- (4)

8. Ken atema anenzükertem

- (5)

9. Toktepa noktak

- (5)

10. Sen

- (6)

11. Benjong agi

- (5)

12. Telung nung rizünga ayu

- (4)

13. Tebang nung enok

- (4)

OLONG PAITEP # 7259 TELANGZÜBA**TIPIEN :**

1. Aben, 4. Artsü, 7. Lisem, 8. Liwa,

9. Sarasadem, 12. Aket,

14. Mangu, 15. Anünü, 16. Ango.

LANGTSÜNGLEN :

1. Aruli, 3. Balala, 5. Suwar,

6. Belem, 9. Süjak, 10. Aonung,

11. Dokan, 13. Tinu.

NAI-A YA METETTER

Karnataka nungi Bharatanatyam artist Vidushi V. Deeksha-i ghonda 216 tashi maneni shilem agiba atema Golden Book of World Records nung tenüng züluokogo. Vidushi-i Udupi nung anogo 9 tashi khien danga maneni shilem agia liasü aser Honibarnü tembang.

Lai G. Shankar Government Women's First Grade College, Ajjarakadu nung August 21 nikongdang 3.30 ako nungi shilem agitsü tenzük aser kasa college nung August 30 nikongdang 3.30 ako nung tembang. Iba atema Karnataka Deputy Chief Minister D.K. Shivakumar-ia la nem tenüngsang agüja liasü.

Debabrata Saikia-i AASU dang CAA anema noktaksü ayongzüker

Guwahati, September 3, 2025 (Agencies): Assam nung Leader of the Opposition Debabrata Saikia-i All Assam Students' Union (AASU) dang Citizenship Amendment Act (CAA) anema maneni noktaksü shidi ka züluogo.

CAA ya Assam Accord den meputep lir aser Assam asoshi majung ta Saikia-i shidi nung shia lir.

BJP-i aniba Centre sorkari Assam putiotsü tenangzüktep senzüka yutsür CAA mapa tenzükogo aser iba ya ozüngi memelar ta pai ashi.

"Chief Minister Himanta Biswa Sarma-i district ketdangsürtem aser police dang Bangladesh, Afghanistan, aser Pakistan nungi aruba nisungtem anema ken o tem benoka aliba agientsü tetuyuba agütsüogo. December 31, 2024 matongdang aruba Hindu, Christian, Buddhist,

**Debabrata Saikia**

Sikh, Parsi, aser Jain nunger anema ken o benoka alibatam agientsü aser iba ajanga parnoki India senso angutsü lenmang lapoktsür" ta Saikia-isa ashi.

Iba ajanga Assam Accord telatet nung maliba bendanger lakh 5 shi ka nem senso agütsü aser iba nung Foreigners' Tribunals ajanga foreign nationals ta sangdonga aliba nisung 69,500 dena lir ta paisa AASU dang ashi.

Assam Accord nung March 24, 1971 matongdang Assam-i arurtem dang India sensotem ta agizütsü lateta lir. Centre-i CAA agizütsü merangba anema lungkak aítang nisung pungu tashi taküm samaogo ta Saikia-isa metetdaksü.

Kidanger linüktem nung nübo agi tangar memenepertem reshikangshiba atema teyari agütsüsüla saka Assam nung ali aser rongsen peria mali anungji nütsüng yongsük talila anidenba ajanga lisopurtemi timtem ajurutsü. Assam nung refugee tem nem India senso agütsüra iba ajanga tarutsü nung lendong bentsür arutsü ta paisa ashi.

Saikia-isa AASU dang CAA anema maneni noktaksü, Assam Accord nung lateta aliba cut-off date of March 24, 1971 amshitsü aser CAA kübok Assam madentsü atema inyaksü ayongzüker.

IDPs indang relief funds tim mesüi amshiogo: Manipur Congress

Imphal, September 3, 2025 (Agencies): Moirang Assembly Constituency kübok relief camps nung alir internally displaced persons (IDPs) meyong senotsü tim mesüi amshiba atema Manipur Pradesh Congress Committee (MPCC)-i bushisüngdang ka asütsü takhangba agütsüogo.

IDPs nem senotsü lemzüksüba nung sen aika tim mesüi amshiba putetogo ta Congress spokesperson Hareshwar Goshwami-i Congress Bhavan nung osangbener dang ashi.

Nisung anati Right to Information (RTI) tasüngdangba agütsüba ajanga senotsü tim mesüi amshiba metet aser iba mapa nung Moirang MLA Thongam Shanti Singh densema alitsü akok ta Goshwami-i ashi.

Okshongbung Moirang nung alir Yumkhaibam Shyam Singh-i RTI temepishiba aika agütsüogo. Pai December 2023 aser March 2024 tsünga State Public Information Officer, the Final Appellate Authority, aser Manipur Information Commission dang asüngdang.

Ano, Moirang nung alirsa Heisnam Sushil Singh-i August 2025 nung relief camp management osang metetnua RTI application ka agüja liasü.

Moirang AC nung relief camps 20 aliba nungi 14 aküm saka talirtem 3,905 nungi 4,542 aküm. May 2023 aser August 2025 tsünga IDP welfare atema Rs 23.21 crore shi endok. Iba nungi Rs 2.05 crore ji Centre aser state sorkar nungi one-time assistance ama agütsü.

"IDPs nem relief materials agütsüba MLA ajanga inyak

aser sorkari masü saka pa nija agi agütsür ama inyak. Pai iba ya tiyazü ta süra osettem kong nungi aru osang tejangja agütsüsüla. Iba mapa nung MLA-i shilem agiba bushisüngdangtsüla" ta Goshwami-isa ashi.

RTI data ajanga toothbrushes, toothpaste, spices, fermented fish, vegetables, firewood, & gas refills nung Rs 7.14 crore, bananas, biscuits, eggs, & noodles nung Rs 2.1 crore, pillows nung Rs 11.2 lakh, television & DTH sets nung Rs 11 lakh endok ta ashir.

"RTI telangzübatem nung ashibaji oset jenjang den khienyong meputep. Iba ajanga senotsü tim mesüi amshiogo ta temulung malemer. Iba ya judicial inquiry tim kati jangjatsüla" ta Goshwami-isa metetdaksü.

Bodoland nung land records ajak digitize süogo


Guwahati, September 3, 2025 (Agencies): Sixth Schedule kübok tribal council kati land records ajunga digitize asübaaji Bodoland Territorial Region (BTR) lir.

BTR tasazük ya 8,970 sq. km lir aser ketdangsürtemi texts & maps dena land documents lakh 15 tema digitized süogo.

BTR ya Bodoland Territorial Council (BTC) ajanga ketdang asür aser district 5- Baksa, Chirang, Kokrajhar, Tamulpur, aser Udalguri lir.

Iba digitisation drive ya 2023 nung tenzük aser iba ya ali kibur nung tashishitep malitsü aser sobaliba nungi ali benshia aruba tezübaba akümtsü atema inyak ta ketdangsürtemi ashi.

Iba mapatong nung ground-level surveys, cross-verification of revenue records, aser Geographic Information



System (GIS) mapping dena inyak ta BTC Secretary Dhiraj Saud-i ashi.

BTR sorkari Digital India Mission maparen inyakba nung iba ya kanga puteper aser Mission Bwiswmwuthi 2.0 tashi itdaksür.

Mezüngbuba shilem nung mission ajanga ali dak sendakba service 14 agütsü

aser applications lakh 2.11 tema agizüka liasü. Iba ajanga kibong 47,000 ajangzük aser parnok rongnung small tea growers aser rubber farmers 9,000 densema lir.

Iba digital platform tasenba ajanga sensotemi kiosks, mobile applications, aser web portals ajanga land status metettsü akok.

Israel drone temi Lebanon nung peacekeeper tem anasa grenade tsükdaktsü: UNIFIL

Beirut, Rongjui/September 3 (Agencies): United Nations Interim Force in Lebanon (UNIFIL)-i ashiba agi, Israel nunger indang drone temi Mogolbar anepdang Israel den Lebanon arrtsü nung peacekeeper tem anasa grenade pezü tsükdakja liasü.

"Taoba küm November ita rara anentsü atema nangzüktepba sülen iba ya UNIFIL sepai aser parnok indang garitem amakba tesashitiba rongnung ka lir," ta UNIFIL-i Bodhbarnü sangdong ka ajanga metetdaksü.

"Grenade ka meter 20 tsüingda apok aser asem UN sepai aser garitem nungi meter 100 pilar apok," ta parnokisa ashi.

Peacekeeper tem ya lenmang nokdanger aliba merekteta aliba mapang iba lendong ataloka liasü, ta UNIFIL-i ashi.

2024 küm November ita Hezbollah den nangzüktepba ama Israel-i minyaker aser anogoshia amai Lebanon

amaker. Parnoki ashiba agi, parnoki Hezbollah pur tamendakdak aser parnok züngsemtem amaker. Ajisüaka iba mapang parnoki civilian tem aika tepseter, nüburtem minshir aser infrastructure balala aser nisung aliba ki raksatsür.

UNIFIL-i ashiba agi, parnoki Marwahin yimtsüng anasa iba tesem nung lenmang merektettsüba indang Israel army nem jelia osang agütsür liasü.

"UN peacekeeper tem aser parnok indang oset tem lendong nung toktsütsüsa jenjang agiba, aser parnok mapa nung minprongba ya Resolution 1701 aser international temzüng ozüing anema lir," ta UNIFIL-i ashi.

Beirut nungi Al Jazeera osangbener Zeina Khodr-i ashiba agi, "lenmang nokdanga aliba merektettsü atema UN peacekeeper temi mapa inyaktsü ta Israel army-i meteter liasü, aser ibayongji parnoki parnok ya asa amak ta ashir."

Khodr-isa, Lebanon-i UN

sepaitem modaktsüner, kechiyong iba tesemi yoktsü atema Lebanon army peria mali.

"Hezbollah pur loksatsütsü atema Lebanese state bendanga agütsür lir. Ibaji inyaktsü atema south leni army yoktsü nüngdaker aser ibayongji parnoki UNIFIL nüngdaker," ta lai ashi.

UNIFIL ya 1978 küm tenzük aser parnok yagi Israel den Lebanon south len arrtsü anüker.

Taoba hopta United Nations Security Council-i Lebanon nung peacekeeping mission ya 2026 küm tatem tashi atsülangtsüogo, iba sülen sepaitem tanem tanemi atsüngintsü.

Israel aser United States nati UNIFIL anintsü asoshi nongshia arudar. Linük ana yagi ashiba agi, iba telok yagi 2006 küm rara sülen nungi Hezbollah nem yimden yimsüsüba tsütsü teküzmükba agütsür aser Hezbollah disarm mesüteti arudar.

Pelaba Lemsateper



Tsürabur **Lt. Chubatemsu Atsongchanger** asüku nung kija taküitem, medemertem, kinunger, Yimden balala, Ward yimdentem, Arogotem, Town Councillors, lokti balala, doctor aser nurse, aser shirnokisa nenok temeim, sarasadem, rongsen aser shisatsü ajanga ozü kibong den yaritepogo, nenok ajak dang ozü temulungjang taroktiba agi pelaba lemsateper. Tsüngremi nenok ajak moajangma.

"Rongsen tulu dang nungi tenüing tajungang shimtettsüla. Hon aser taribi dang nungi maongka tajungba". Apijemtsu Shin 22:1

~ Temeim Kinungertem.

Sudan nung anentsüh agi nisung 1,000 dak tema tepset



Khartoum, Rongjui/September 3 (Agencies): Sudan kübok Darfur tesem anüolen anentsüh agi yimtsüng ka ajunga raksatsüogo aser nisung 1000 shi sür alitsü ta iba tesem azüoker aliba telungpur telok kati ashi.

News agency balala ajanga ashiba agi, Sudan Liberation Movement/Army (SLM/A)-i Hombarnü menor sangdong ka ajanga Darfur kübok Marra tenem nung lendong atalokba indang metetdaksü.

SLM/A-i ashiba agi, tzünglu kanga sashia aruba sülen anentsüh ya Deobarnü alu aser Tarasin yimtsüng ajunga anenzüka benerogo, aser iba yimtsü nungi nisung ka dang kümzüka liasü.

"Osang ajang ashiba agi, yimdaklir ka dak alaker parnok meyirejang ka dak tali süogo," ta iba telok yagi ashi.

SLM/A-isa, United Nations aser international aid agency tem dang tanurtem densema tasüidang agitettsü asoshi teyari agütsütsü mepeshia asüingdangogo.

Khartoum nung ruling Sovereign Council-i, Marrah tenem anentsüh lendong nung nisung noklang aika asüba mang ayimer, ta kasa sangdong

ajanga ashiba den, parnoki takokba tashi jenjang agidar ta shisem.

Al Jazeera osangbener Mohamed Vall-i Khartoum nungi ashiba agi, source temi pa dang anentsüh agi anenbanger aliba tasüidangtem agiteta parnok kanga junga remtsütsü atema tetsükdaktsü ajangshidar, ta ashi.

Anentsüh agi kongshir aliba tesem ya gari mesüra ali ajanga tanga transport kechaia tonga moteter, ibayongji nüburtem rara mapang tenem bushia oa jenoker, ta Vall-i shisem.

Sudan nung küm asembuba rara adoker aliba mapang tang iba lendong atalokogo. Iba linük nung tang alima nung humanitarian crises tulutiba adoker lir aser Darfur kübok tesem karbo ayawara agi meneper aliba sangdongogo.

Sudanese army aser paramilitary Rapid Support Forces (RSF) na raratepba ajanga nüburtem Marra tenem nung oa jenoka lir aser parnok chiyongtsü aser mozü agi kanga anünger.

SLM/A indang faction tem shirnoki anentsüh aluba tesem azüoker lir, parnoki RSF anema Sudanese military den longjemer raratsü nangzükogo.

China nunger military parade nung Xi, Putin aser Kim lungjemba sayu

Beijing, Rongjui/September 03 (Agencies): Beijing nung military parade tulu ka agiba mapang China, Russia aser North Korea lenirtemi tang mezüing yimjak nung külemi shilem agia liasü.

China-i alima tesem ajunga tongtettsüba nuclear missiles densema nok-nü jenti sayaba mapang Tir Xi Jinping-i alimai tesunep aser rara tsüingta ka shimtsü tensa ajurua lir ta ashi.

Bodhbarnü sepai meyirijang aika iba parade nung shilem agia China indang mitkar tashi sayua liasü. World War II tembangba sülen küm 80 ajungba bilemteta sepaitem tashi ya sayua liasü.

Aji masüidang Russia Tir Vladimir Putin-i North Korea lenir Kim Jong Un ajuru aser Ukraine nung raratsü atema sepaitem yokba asoshi Putin-i Pyongyang nem tenüngsang agüja liasü.

Xi tenüing nung China-i iba Beijing parade nung adentsü asoshi Putin aser Kim den ano tongtipang nisung 24 jaoka liasü.

Tiananmen viewing platform nungya China indang taoba lenirtem nokdaka liasü, saka tejangja nübu rongnung taoba tir Hu Jintao mangu.

South Korea Tir Lee Jae Myung-a jaok, saka maru, aser India Ato Kilonser Narendra Modi, shibai hopta tetenzüklen Tir Xi ajurua liasü, pa iba sentong nung maden.

Iba sentong nungya Iran Tir Masoud Pezeshkian, Pakistan Ato Kilonser Shehbaz Sharif, Vietnam Tir Luong Cuong aser Zimbabwe Tir Emmerson Mnangagwa nunger dena liasü.

China indang "Victory Day"

parade nungya anüolen linük nungi lenir timba shilem magi.

Sentong tembangba sülen Putin den noksa tangoktsü asoshi anüolen linüktem nungi Slovakia Ato Kilonser Robert Fico aser Serbia Tr Aleksandar Vucic dena liasü.

Beijing indang Tiananmen Square nung parade alidang nisung 50,000 shi jelia adenshia liasü.

Tir Xi-i China mitkar indang kongsang balala nungi sepai meyirijang aika Changan Avenue nung adenshia aliba semdanga liasü.

Iba mapang nok-nü tasen aika sayuba rongnung laser weapons, robotic "wolves" aser underwater nuclear drones tulu tem dena liasü.

China-i par indang stealth attack drones sayu, koba dang "loyal wingman" ta ajar, kechiaser ibai nisung mena aliba fighter jet den külemi anüing nung ayimer aser amakdang yarir.

Parade tembangba temaitsü Tiananmen Square anüngleni posü (dove) aser balloons meyirijang aika yoka liasü.

Iba sülen Great Hall of the People nung lunch reception ka alidang Tir Xi-i minute pongu shi jembidang anüolen linük kata tenünga mesüok, saka taoba mapanga China ketdangsur temi US dang alima nung aliba linük balala dang tariffs meshiba yong "bully" aja.

"Puti otsü nungi linük ajungai lessons angazüktsü, yimjung metsünga-reta amshitsü aser nisung meimchir asoshi tarutsü jenjang tesangwa yanglutsütsü atema külemi inyaktsü kanga imlar," ta Xi-i ashi.

"Nisung meimchir ajunga asoshi arok yimchiyimjung" ta pai shia o tembang.

Iba sülen Diaoyutai State Guesthouse nung Putin aser Kim senden ka ghonda ana ser tesadang mena liasü.

Tenati iba mapang Ukraine rara nung North Korea-i shilem agiba indang sensaksema linük ana tsüingta taoba küm June ita tezüngzüktep yanglua aliba bilemteta jemba liasü.

Ukraine indang front lines nung Russia nunger sepaitem alidak North Korea nunger sepai 15,000 shi oa lir ta asadangteter.

North Korea-i Russia nem injang-bomb tema agütsür. Iba melen North Korea nem senotsü agütsür aser nok-nü yangluba nunga yarir ta amanger.

Iba sentong nung Donald Trump maden aser pai pa indang social media sapang Truth Social nung Tir Xi-i US anema Russia aser North Korea den tasa tamajung yanglur ta aitsü.

"Nai United States of America anema tasa tamajung yangluba mapang imlibilema Vladimir Putin aser Kim Jong Un dang salem shijang," ta Trump-i zülua liasü.

Ajisüaka Kremlin odongtar Yuri Ushakov-ibo US anema tasa tamajung kecha meyanglur ta ashi.

Trump indang o ya anemsü lir aser Putin, Xi aser Kim nungeri United States anema tasa tamajung yanglutsü tebilema mebiler aser lenir aseme tang 'international situation' nung Washington shilem angateter, ta Ushakov-i ashi.

State Red Run 2025 September 6 nü agitsü

Dimapur, Rongjui/September 3 (TYO): Nagaland Olympic Association (NOA) aser Nagaland Athletics Association (NAA) na den longjemer Nagaland State AIDS Control Society (NSACS)-i ayongzüka September 6 nü Regional Centre for Sporting Excellence, Sovima Chumoukedima nung State Red Run 2025 sentong agitsü.

Iba sentong ya National AIDS Control Organisation (NACO), Ministry of Health and Family Welfare, Government of India tawabangba kübok ayongzüka agitsü.

Red Run ya linük ajunga nung ayongzüka agiba sentong ka lir, koba HIV aser STI tem dak sendakba nung tangazükba agütsüsü, taküm libaliro tajung beshitsü aser HIV aser tanga sexually transmitted infections (STIs) tem menatsü ana nung aliba yimyayimpongtem nungi pila alitsü ajungmesotsü atema lir.

Lanurtem marathon amala nung shilem agiba ajanga

libaliro tajung ajungketer aser yimyayimbong tajung beshitsü yimya sübadaktsür. Iba amala inyakyim ajanga libaliro dak sendakba tashidaktem nungi jenboa lidaktsüba dang masü, saka lendong aketba yimyayimpongtem koba ajanga HIV aser tanga STI tem menatsü lendongbang nung toktsür, item amala nungi pila lidaktsür.

State Red Run 2025 nung Nagaland kübok district 17 prongla nungi tetsür aser tebur takokertemi (1st, 2nd & 3rd) shilem agitsü. Maneni open category nunga asayar akati shilem agitsü imlar. Open category atema asayartemi asaya ayongertemi nagalandsacs aser nagalandathletics ta media sabangtem nung agüja aliba official QR code scan süa pei tenüng züngoksemtettsü.

Asaya aser sempet:
State Level - 10KM
(tetsür aser tebur)
(Qualifiers through District Red Run)
1st - Rs. 15,000

2nd - Rs. 12,000

3rd - Rs. 10,000

Open - 10KM
(tetsür aser tebur)

1st - Rs. 15,000

2nd - Rs. 12,000

3rd - Rs. 10,000

4th - Rs. 8,000

5th - Rs. 5,000

Open category atema guideline tem:

September 6 nü asaya nung shilem agitsüpurtem ajak anepdang 7 ako matong tsüngda verification aser bibs agizüktsü asoshi Regional Centre Sporting Excellence, Sovima, Chümoukedima atongtsüla.

Category 2: Open 10K Run (tetsür aser tebur) - arishi küm 16 temapur ajaki shilem agitettsü.

Registration Fee (Open Category atema dang): Sen 200 agitsü, koba asayaba anogo asayaba tesem nung agütsütettsü.

Asayamung ayongertemi agütsür aliba official QR code scan süa asaya atema züngoksemtettsü.

Sandesh Jhingan CAFA Nations Cup masayatettsü



Rongjui/September 3, 2025 (Agencies): India nunger nüngtugu defender Sandesh Jhingan, Iran goal 3-0 agi makokba asaya nung yiruba sülen CAFA Nations Cup nung tanungba asayatem nung masayatettsü, koba India team atema kanga takoksa tulu asütsü.

Brehostibarnü Group B nung tatembangbuba asaya Afghanistan den asayatsü lia arishi küm 32 tain asayar tejen ya yiruba ajanga India team kanga akoksaogo.

India team-i asaya ana nung point asem ngua parnok par telok nung tanabuba jenjang nung lir. India team-i hosts Tajikistan akok saka world No. 20 Iran team mekoki liasü. Iran Ya Asia nung team tajungtiba rongnung ka lir.

Asaya ana sülen Iran-i asaya anaprongla koka parnoki point trok ngua lir aser par telok nung parnok temaba jenjang nung lir. India team iba asayamung nung asayayonga

aotsü maotsü aji Afghanistan den asaya result dak keta lir.

"CAFA Nations Cup 2025 nung India team Iran den asayaba mapang Defender Sandesh Jhingan yiru aser pa asayatem nung tanungba asayatem nung masayatettsü. Pa India-i tanü meyipa arutsü," ta All India Football Federation (AIFF)-i X nung post sütsü.

World No. 133 India team iba asayamung nung mezüngbuba asaya jenjang 106buba nung aliba Tajikistan den asayaba mapang defenders Anwar Ali (5th) aser Jhingan (13th) nati goal kaka idakja liasü.

Iba asayamung nung Central Asia nung aliba linüktem asayar, saka taküm iba asayamung nung shilem agitsü atema India jaokogo. India team Asian Cup qualifying round atema renemshiba mapang iba asayamung ya kanga tongtibang lir. Asian Cup qualifying ya Singapore nung October 9 nungi 14 tashi asayatsü.

US Open: Alcaraz aser Djokovic na semifinals asayatsü



Rongjui/September 3, 2025 (Agencies): US Open tebur kija asaya nung Mongolbarnü Carlos Alcaraz-i quarterfinal nung Jiri Lehecka koka smifinal tongtetogo.

Spain nunger asayar ya Hokolbarnü semifinal nung Grand Slam 24 koker alisang Novak Djokovic den asayatsü.

Quarterfinals nung Alcaraz-i 6-4, 6-2, 6-4 agi straight set nung Jiri Lehecka madak takok ngua liasü.

Grand Slam trokbuba akoktsü atema meranga asayaba mapang Alcaraz-i iba asayamung nung set ka nung danga tamakok ngua mali. Pai pa indang mezüngbuba Grand Slam ya 2022 küm US Open nung koka liasü.

"Ni asaya kanga temsüa asayatetogo," ta Alcaraz-i ashi, shibai May ita Italian Open nungi tenzüka asaya 36 nungi 35bo kokogo.

Tebur kija asaya nungsa

nüngtugu asayar tejen Novak Djokovic-i Taylor Fritz 6-3, 7-5, 3-6, 6-4 agi koka semifinal tongtetogo, aser pa Alcaraz den asayatsü. Pa otsüsütsüsa Grand Slam 25buba akoktsü atema meranga asayadar aser tanga amai dang asaya tura iba nükjidong tongtettsü akok.

"Asaya kanga toktepba asayaogo. Asaya küna rongnung mashi kati koker lila," ta Djokovic-i ashi. Pa ya Jimmy Connors den külemi US Open semi-final timbaben asayaba asayar kümogo.

Djokovic aser Alcaraz na January ita Australian Open quarterfinals nung asayaba sülen tang mezüngbuba asayatsü lir. Iba asaya ya Serbia nungba yagi akok aser tena ti ben asayar aliba nung Djokovic-i pongubenbo koka lir.

Tetsür kija asaya nung taoba küm US Open koker alila Aryna Sabalenka-a semifinal-i iogo. Quarterf final

nung la den asayatsü alila Marketa Vondrousova temekok yiruba ajanga masayatettsüsa akümba sülen la semifinal-i iogo.

World number one Sabalenka ya semifinal nung fourth-seeded America tsür Jessica Pegula den asayatsü, koba taoba küm final asayashiba ama asütsü.

Maneni US Open tebur tarep asaya nung India nunger asayar Yuki Bhambri pa indang career nung tang mezüngbuba Grand Slam ka quarterfinals tongtetogo.

New Zealand nunger asayar Michael Venus den külemi Bhambri-i, Germany nunger tarep Kevin Krawietz aser Tim Puetz na 6-4, 6-4 agi koka liasü.

Tena taruba asaya Croatia nunger asayar Nikola Mektic aser pa indang America nunger partner Rajeev Ram na den asayatsü.

4buba Mungmung benjung football asayamung asayaogo

Dimapur, Rongjui/September 3 (TYO): 4buba Mungmung Festival Open football asayamung shibangba sentong September 2 nü Angangba Public ground nung agiogo. Iba sentong nung EAC, Longkhim, S. Chingmei alakteta jaoker liasü.

Iba asayamung ya Angangba Village Council-i ayongzüka asaya liasü.

Sentong nung o jembiba mapang Chingmei-i, iba asayamung ayongzüka atema asayamung ayongzüka committee nem tenüngsang agütsü aser sentepa alir ajak den Mungmung benjung salem lemsatapa liasü.

Chingmei-isa, Angangba Baptist Church, Village Council, tetsürtem lokti tentet balala, kaketshir lokti tentet aser lanurtemi, temesepba mozü achirtem Rehabilitation atema teyari agütsüba atema parnok nem tenüngsang agütsüba den laisa, sentepa

aliba lokti dang lokti ajangzüksü atema maneni nongita yaritsü aser tejakleni aotsü ajungshia liasü.

Maneni lai Longkhim ya temesepba mozü achirtem mongjen ka ama nüngja agütsür aliba ya agintsü aser tejakleni aoba lokti ka kümdaktsütsü asoshi meranga inyaktsü ayongzüka liasü. \

Football asayartem ajungshiba mapang lai ashiba agi, takok angutsü atema short cut kecha mali, saka football asayar tajung ka akümtsü atema küm aika bendanga agüja meranga inyaktsüsa akümer.

Iba asayamung final nung Rohzi FC-i goal 3-2 agi Tsungzi Fc koka taküm parnoki iba asayamung kokogo.

Sentong nungsa 2nd HD.Gb, Limameren-ia o tatsüka jembia liasü. Sentong mozü achirtem Rehabilitation atema teyari agütsüba atema parnok nem tenüngsang agütsüba den laisa, sentepa o jembia liasü.

BILEMDANGANG

"Tarutsü atema shisabuludang tanü mapang nung tamakok malutsü merangang."